

Nalinginnaasumik inuussutissarsiutinik siuarsaaneq pillugu Inatsisartut inatsisaat

Inatsisartut inatsisaanni nr. 4, 3. juni 2016-imeersumi, Inatsisartut inatsisaanni nr. 27, 17. november 2017-imeersumi, Inatsisartut inatsisaanni nr. 21, 1. december 2021-meersumi aamma Inatsisartut inatsisaanni nr. 61, 25. november 2024-meersumi allannguutit ilanngullugit matumuuna Nunami inuussutissarsiutinut tunngatillugu inuussutissarsiornermik siuarsaaneq pillugu Inatsisartut inatsisaat nr. 20, 3. decembari 2012-imeersoq nalunaarutigineqarpoq.

Kapitali 1

Atuunneqarfa

§ 1. Aningaasanik immikkoortitsineqassaaq inuussutissarsiornermi pilersaarutitut inuiaqatigiit aningaasarsiornerni iluaquusiinnaasutut nalilerneqartunut, assersuutigalugu tunisassiornerunermik suliffissanillu amerlanerulersitsinernik kinguneqartut, tapiissuteqarfigineqarnissaat siunertaralugu tapiissutitigut aaqqiissutinik aningaasalersuisussanik.

Imm. 2. Ingerlatsinermut namminermut tapiissuteqartoqarsinnaangilaq.

§ 1a. Aallarnisaasunik ineriartortitsinermik ingerlataqarnerit piffissamut killiligaasut, tassaasut aallarnisaasunut aalajangersimasunut pikkorissaanerit aamma siunnersuineq, aammalu assersuutigalugu amerlanerusunik imaluunniit annertunerusunik inuussutissarsiornermi ingerlataqalerluni imaluunniit inuussutissarsiornermut suliffeqarfimmi sulisunut suliffissaqartitsinerulerluni inuiaqatigiit aningaasaqarnerannut iluaqutissartaqartitsilersussatut nalilerneqartut, tapersiivigineqartarnissaat siunertaralugu, aallarnisaasunik ineriartortitsinermut aaqqissuussanik aningaasalersuinissamut aningaasaliissutinik ataatsimoortunik pilersitsisoqarsinnaavoq.

§ 1b. Suliffeqarfiit minnerusut aningaasalersuutissarsiniartarnerisa ajornannginnerulersinnissaa siunertaralugu, annikitsunik taarsigassarsititsisarnermik aaqqissuussinermut aningaasalersuutissanik, aningaasaliissutinik ataatsimoortunik pilersitsisoqassaaq.

Imm. 2. Kommunit aningaasalersueqataallutik annikitsunik taarsigassarsititsisarnermut aaqqissuussinermi peqataanissamut periarfissaqarput. Aningaasalersueqataanissamut atugassarititaasut Naalakkersuisut aamma kommunit ataasiakkaat akornanni isumaqatigiisummi aalajangersarneqassapput.

§ 2. Inatsisartut inatsisaanni nalinginnaasumik inuussutissarsiutinut tapersiisarneq pineqartunut ilaatinneqarpoq.

Imm. 2. natsisartut inatsisaat manna malillugu siunertanut inatsisit allat malillugit tapiissuteqartarnermi aaqqiissutitut ilaareersunut tapiissuteqartoqarsinnaanngilaq.

§ 3. Aallaavittut inuussutissarsiornermi ingerlatanut Kalaallit Nunaanni isumagineqartunut taamaallaat tapiissuteqartoqarsinnaavoq. Taamaattorli pikkorissarnernut imaluunniit atortussanik pisiortornernut Kalaallit Nunaanni neqeroorutaasinnaanngitsunut tapiissuteqartoqarsinnaalluni.

Kapitali 2

Inuussutissarsiornermut tapiissutit aningaasatillu immikkut ittut

§ 4. Aningaasat ukiumoortumik aningaasanut inatsimmi immikkoortinneqartut iluanni tapiissuteqartoqartassaaq.

§ 5. Tapiissutit qinnuteqareermermi tunniunneqassapput, makkunungalugu atatillugu aningaasartuutit uppersaasernerini utertinnissaannut neriorsuinikkut:

- 1) pilersitsineq amma alliliineq,
- 2) tunisassianik suleriaatsinillu ineriartortitsineq,
- 3) niuerfissanik pilersitsineq imaluunniit
- 4) pilersaarusioneq.

Imm. 2. Taamattaq tapiissutit tunniunneqarsinnaapput aningaasat inuussutissarsiteqartunik siunnersorneqarnermut atugassanik aningaasat amerlassusii aalajangersimasut neriorsuutiginerisigut, soorlu inatsilerituumit imaluunniit kukkunerisuisunit ikiorneqarneq.

Imm. 3. Imm. 1 aamma 2 malillugit tapiiffigineqarnissamik qinnuteqaat qinnuteqarnissamut immersugassaq Naalakkersuisunit suliarineqarsimasoq atorlugu suliarineqassaaq, paasisutissanillu tassani piumasaqaatigineqartunik imaqaassalluni.

Imm. 4. Imm. 1 aamma 2 malillugit tapiiffigineqarnissamik qinnuteqaat qinnuteqarnissamut immersugassaq Naalakkersuisunit suliarineqarsimasoq atorlugu suliarineqassaaq, paasisutissanillu tassani piumasaqaatigineqartunik imaqaassalluni.

§ 5a. Tapersiineq aamma aallarnisaasunik ineriartortitsinermit ingerlatanut tunniussivigineqassaaq.

Imm. 2. Imm. 1 naapertorlugu aallarnisaasunik ineriartortitsinermit ingerlatat tassaapput pikkorissaalluni aamma siunnersuilluni ingerlataqarnerit piffissamut killiligaasut, aallarnisaasunut aallarnisarnerup immikkoortuaniittunut, aammalu aallarnisaasunut suliffeqarfutiminni Kalaallit Nunaanni qaammatinit 12-iniit sivikinnerusumik nalunaarsorsimasimasunut, ikiorsiissutigineqarsinnaasut.

Imm. 3. Aallarnisaasunik ineriartortitsinermit ingerlatanut tapersiissutit piffissamut qaammatit 24-it ikillugit siviussusilimmut tunniunneqarsinnaapput.

Imm. 4. Naalakkersuisut aallarnisaasunik ineriartortitsinermit ingerlatanut aalajangersakkanik erseqqinnerusunik aalajangersaasinnaapput, ilanngullugit tapersiissutinik tunniussinissamut atugassarititaasut.”

§ 5b. Qinnuteqartoqareerneratigut taarsigassarsititsisoqarsinnaavoq § 5, imm. 1-imi siunertanut nalunaarsorneqartunut imaluunniit aningaasaliissutitut sulisitassatut.

Imm. 2. aalakkersuisullu aalajangersagaliorsimappata inuussutissarsiutini ingerlatanut imaluunniit suliffeqarfinnut aalajangersimasunut tapersiissuteqartarniarlutik § 6 naapertorlugu, aamma taarsigassarsititsisoqarsinnaavoq inuussutissarsiutini ingerlatanut pineqartunut suliffeqarfinnulluunniit aalajangersimasunut.

§ 6. Suliaqarfinnut aalajangersimasunut imaluunniit suliffeqarfinnut immikkut ittunut tapiissuteqartarneq pillugu Naalakkersuisut maleruagassanik aalajangersaasinnaapput, tamakkununnga ilaallutik aningaasaatit aalajangersimasut ilaat ukiumoortumik aningaasanut inatsimmi immikkoortinneqartut tamakkununnga inniminneerneqartassallutik kiisalu suliaqarfinnut imaluunniit suliffeqarfinnut tamakkununnga tapiissuteqarnissaq pillugu neriorsuinissamut piunasaqaatit erseqqinnerusut aalajangersarlugit.

Kapitali 3

Piunasaqaatit nalinginnaasut

§ 7. Inuussutissarsiortermit suliffeqarfinnut pilersaarutinullu namminersortunut, piffissap sivisuup ingerlanerani aningaasarsiornikkut sinneqartooruteqarnissamik siunertaqartunut taamaallaat tapiissuteqartoqarsinnaavoq.

Imm. 2. Tapiiffigineqarnissamik neriorsuut allanut tunniunneqarsinnaanngilaq imaluunniit eqqartuussutitigut malersuinissamut peqquteqartitsisinaanani.

Imm. 3. Pilersaarutinut imaluunniit ingerlatanut pisortat aningaasaataannit allanit tapiissutini imaluunniit aningaasalersuinermit pissarsisanngitsunut taamaallaat tapiissuteqartoqarsinnaavoq.

Imm. 4. Tapiissuteqarnissamik neriorsuineq qinnuteqaammi ingerlatsinikkut inuiaqatigiinnilu aningaasarsiorterup nalilersorneqarnera tunngavigalugu tunniunneqartassaaq. Ingerlatsinermit aningaasaqarnikkut nalilersuinermit qinnuteqartup sulianut aqutsinermullu piukkunnassuseqarnerinik, qinnuteqartup aningaasaqarneranik aammalu ingerlatsinissamut pilersaarutip aalajangersimasup attanneqarsinnaanerani nalilersuineq ilaatigut ilaatinneqassaaq, taamaattoq takuuk imm. 5.

Imm. 5. Tapersiinissaq annikitsunik taarsigassarsititsinertut ittoq pillugu neriorsuuteqarneq, qinnuteqaatip ingerlatsinermit aningaasaqarnikkut inuiaqatigiillu aningaasaqarnerannut nalilersorneqarnera tunngavigalugu tunniunneqassaaq. Ingerlatsinermit aningaasaqarnermit nalilersuinermit, ingerlatsinissamut pilersaarutip aalajangersimasup attanneqarsinnaassusaanik nalilersuineq, taamaallaat ilaatinneqassaaq.

§ 8. Tapiiffigineqarnissamik neriorsuineq inunnt imaluunniit suliffeqarfinnut tigussaasunut Kalaallit Nunaanni najugaqartunut imaluunniit nalunaarsorsimasunut kiisalu Kalaallit Nunaanni tamakkiisumik akileraartussaataasunut taamaallaat tunniunneqarsinnaavoq.

Imm. 2. Tapiiffigineqarnissamik neriorsuummik tunniussisoqarsinnaanngilaq, pissarsisussaq imaluunniit pisortaaneqarfimmi siulersuisuniluunniit inuit aqutsisuusut akileraartarnermit inatsimmik annertuumik unioqutitsisimasutut imaluunniit Kalaallit Nunaanni pinerluttulerinermi inatsimmi aningaasarsiortermit pinerluuteqarnermit aalajangersakkanik unioqutitsisimasutut pineqaatissinneqarsimappata imaluunniit pisortanut akiitsoqarpata annertuunik akiligassanngorsimasunik, taamaattoq takuuk imm. 3.

Imm. 3. Annikitsunik taarsigassarsititsinissaq pillugu neriorsuuteqarnermi, qinnuteqartoq pisortanut annertuunik akiitsoqarnerseq, isiginiarneqassanngilaq.

Imm. 4. Neriorsuineq tapiiffigineqarnerlu pillugit qinnuteqartumut Naalakkersuisut qaavatigut piomasaaqateqarsinnaapput atugassaqartinneqarlutillu, kiisalu tamakku pillugit maleruagassanik erseqqinnerusunik aalajangersaasinnaallutik.

Kapitali 4

Tapiissutit annertussusiat aamma sivissusiat il.il.

§ 9. Tapiissuteqarnissamut neriorsuinermi taaneqassaaq, tapiissuteqarsinnaanermut aningaasat amerlanerpaaffissaat qanoq amerlatigissanersut, kiisalu aningaasat taakku killissaasa iluini anigaasartuutit uppernarsaaserneqarsimasut procentiisa qanoq amerlassuseqarneri utertinneqarsinnaanersut.

Tapiissutit tunniunneqarnissaannut piomasaaqataavoq aningaasartuutit pilersaarummut toqqaannartumik tunngatinneqarsinnaappata, pilersaarutillu isumagineqarnissaanut pisariaqartinneqarpata. Taamattaq piomasaaqataavoq aningaasartuutit piffissap neriorsuiffusup aalajangikkap iluani akilerneqartussaasut.

Imm. 2. § 5, imm. 1 malillugu tapiissuteqarnermi pilersaarutip nassuiarneqarnera, tapiiffigineqarnissamik neriorsuinermit tunngaviusimasoq, malillugu aningaasartuutissatut uppernarsaataasut amerlanerpaamik 50 %-iisa amerlaqataat akilerneqarsinnaapput.

Imm. 3. Tapiissutit amerlassusissai neriorsuinerullu sivissusissaa pillugit Naalakkersuisut maleruagassanik erseqqinnerusunik aalajangersaasinnaapput.

§ 9a. Taarsigassarsititsinissamut neriorsuummi § 5 b naapertorlugu nalunaarneqassaaq taarsigassarsiarititassat annertussusiat, 20.000 kr.-nit 100.000 kr.-nut annertussuseqarsinnaasut, taamaattoq tak. imm. 7.

Imm. 2. Taarsigassarsititsinissamik neriorsuinermi atugassarititaavoq aningaasartuutissatut missingersuusiat suliniummut toqqaannartumik attaveqarneri imaluunniit aningaasaliissutitut sulitassatut, taarsigassarsiassanut tunngasumik.

Imm. 3. Aningaasat taarsigassarsiaritinneqartussat 1-imik imaluunniit arlalinnut agguarlugit tunniunneqarsinnaapput.

Imm. 4. Aningaasat taarsigassarsiaritinneqartussat annerpaamik aningaasartuutissatut missingersuusiasut 75 pct.-erisinnaavaat suliniummik allaaserinninneq naapertorlugu suliaasut, qinnuteqarnermilu tunngaviusut. Taamaattoq aningaasat taarsigassarsiaritinneqartussat annerpaamik 25 pct.-iusinnaapput, taarsigassarsitinneqarnissamut qinnuteqaammi inatsisip tapiissuteqartarnermut periarfissatut aqqissuussai allat ilanngullugit atorneqarpata, takukkit § 5, imm. 1 aamma § 6, imaluunniit aningaasartuutissatut missingersuusiasut 50 pct.-ii, aningaasaliissutit sulitassat pineqarpata.

Imm. 5 Taarsigassarsititsineq pisassaaq niuernermi atugassarititaasut tunngavigalugit, tamatumani aamma erniat, akilersuineq, akitsuutit aamma taarsigassarsititsinermit aningaasartuutit eqqarsaatigalugit atugassarititaasuni, taarsigassarsisup aamma taarsigassarsititsinermi allaffissornikkut sullissisuusup akornanni isumaqatigiissutaasumi, tak. taamaattoq imm. 4.

Imm. 6. Taarsigassarsiaritinneqartunut qularnaveeqquusisoqartassanngilaq, taarsigassarsitinneqartussallu nalilerneqarnerani taarsigassarsititsisarnerup siunertaa isiginiarneqartassaaq, tak. § 1 b.

Imm. 7. Naalakkersuisut taarsigassarsititsisarnermik aaqqissuussineq pillugu ersarinnerusunik aalajangersagaliorsinnaapput, tamatumani aamma aningaasat pineqartut killissaannik.”

Kapitali 5

Aqutsineq, nalunaarusiortarnej, atorunnaarsitsineq aamma maalaaruteqarneq

Aqutsineq aamma sulianik suliarinnittarneq

§ 10. Naalakkersuisut allaffissornikkut tapiissuteqartarnermi suliassat §§-ini 5, 5 a aamma 5 b suliassat pillugit kommunalbestyrelsimut imaluunniit allaffissornikkut ingerlatsivimmuut isumaqatigiissuteqarsinnaapput.

Imm. 2. Imm. 1 malillugu suliffeqarfimmik allaffissornermik ingerlataqartumik isumaqatigiissusiortoqarpat, pisortat ingerlatsineranni sulianik suliarinnittarneq pillugu inatsisartut inatsisaat aamma ingerlatsinermi ammasuunissaq pillugu inatsisartut inatsisaat suliffeqarfiup allaffissornermik ingerlataqartup inatsisartut inatsisaat manna malillugu suliaminik isumaginninnera pillugu atuutsinneqassapput.

Nalunaarusiortarnej aamma paasisutissat pillugit nalunaaruteqartarneq

§ 11. Naalakkersuisut inunnit imaluunniit suliffeqarfinit tapiiffigineqarnissamik neriorsorneqarsimasunit paasisutissat, uppernarsaatit, takussutissat naatsorsuutillu tapiissutininik akiliinissamut aalajangerniarnermi pisariaqarsinnaasutut nalilerneqartut tamaasa tunniuteqqullugit piunasaqarsinnaapput.

Imm. 2. Naatsorsuutininik saqqummiussisarnej, kukkunersuineq, nakkutilliineq misissuisarnerlu pillugit maleruagassanik erseqqinnerusunik Naalakkersuisut aalajangersaasinnaapput.

Neriorsuinerup atorunnaarsinnera aamma tapiissutininik utertitsisarnej

§ 12. Tapiissuteqarnissamik neriorsuinerup atorunnaarsinnissaa imaluunniit tapiissutininik utertitsinissaq pillugu Naalakkersuisut aalajangiinnaapput, tapiissuteqarfigneqartoq pisussaataani inatsisartut inatsisaat manna malillugu tapiiffigineqarsimappat imaluunniit tapiiffigineqarnissamik neriorsuummik angusaqarsimappat imaluunniit neriorsuummik pissarsisimappat imaluunniit tapiiffigineqarsimappat.

Imm. 2. Ima pisoqarsimatillugu utertitsinissaq piunasaqaatigineqarsinnaavoq:

1) Tapiissuteqarfigneqartoq piaaraluni imaluunniit annertuumik mianersuaalliornikkut paasisutissanik tapiissutininik pissarsinissamut pingaaruteqartunik eqqunngitsunik imaluunniit pututitsiniutinik tunniussaqaarsimappat.

2) Tapiissutininik pissarsinissamut piunasaqaatit pigisimangippagit.

Imm. 3. Inuit imaluunniit suliffeqarfiit tapiissuteqarfigneqarnissamik neriorsorneqarsimasut, aningaasarsiornermi pissutsinilu allani tapiiffigineqarnissamik neriorsuisimanerup atorunnaarsinneqarnissaanut Naalakkersuisut naliliinissaannut pingaaruteqarsinnaasut annertuumik allangornerini pillugit Naalakkersuisut nalunaarfigissallugit pisussaaffeqarput.

Imm. 4. Qinnuteqartoq imaluunniit suliffeqarfik ima iliorsimatillugu tapiiffigineqarnissamik neriorsorneqarneq imminut isumagisumik atorunnaassaaq:

- 1) naatsorsuutitik imaluunniit uppersaatit allanik § 11, imm. 1 malillugu Naalackersuisut piumasarisimasaannik, tassani piffissamut killiliussap allassimasup iluani nassiussinngippat, imaluunniit”
- 2) akiliisinnaajunnaartussatut suliarineqarpat, imminut akisussaajunnaarsitaappat imaluunniit suliffeqarfimmik ingerlatsisinnaanermik arsaarneqarpat.

Maalaaruteqarneq

§ 13. Inatsisartut inatsisaat malillugu aalajangiinerit allaffissornikkut oqartussanut allanut maalaarutigineqarsinnaanngillat. Tamannattaaq § 10, imm. 1 malillugu atuuppoq kommunalbestyrelsi imaluunniit allaffissornikkut suliffeqarfik aalajangiisuusimappat.

Kapitali 6

Pineqaatissiinerit aamma atuutsilerfissaa assigisaallu

§ 14. Kinaluunniit piaaraluni imaluunniit annertuumik mianersuaalliornikkut ima iliortoq Kalaallit Nunaanni Pinerluttulerinermi inatsit malillugu pineqaatissineqarsinnaavoq:

- 1) Pisussaatitaanani tapiiffigineqarnissamik neriorsorneqarnissaq imaluunniit tapiissutitik akiliiffigineqarnissaq anguniarlugu paasissutissamik eqqunngitsunik imaluunniit pututsitsiniutitik tuniussisoq imaluunniit paasissutissamik nipangiussisimasoq.
- 2) Tapiissutitik tunniunneqarsimasunik tamatumunnga piunasaqaatit unioqqutillugit atuisoq.

Imm. 2. Inatsisartut inatsisaanni maleruagassiat malillugit Kalaallit Nunaanni Pinerluttulerinermi Inatsimmi malittarisassat malillugit akiliisitsinermik pineqaatissiinissaq aalajangersarneqarsinnaavoq.

Imm. 3. Inatsisartut inatsisaanni imaluunniit inatsisit malillugit aalajangersagaq malillugu akiliisitsinissamik pineqaatissiisarnissamut pisinnaatitsineqarpat, Kalaallit Nunaanni pinerluttulerinermi inatsimmi § 17 malillugit akiliisitsineq inummut inatsisinut attuumassuteqartumut tutsinneqarsinnaavoq.

Imm. 4. Inatsisartut inatsisaat manna malillugu imaluunniit inatsisartut inatsisaat malillugit maleruagassat aalajangerneqarsimasut malillugit akiliisitsinermik pineqaatitsiissutit landskarsimut nakkartinneqassapput.

§ 15. Inatsisartut inatsisaata atuutitfiggissavaa 1. januar 2013.

Imm. 2. Tamanna ilutigalugu takornariartitsinermik inuussutissarsiuteqarnerup nunamilu inuussutissarsiorerup iluanni inuussutissarsiorerinermik siuarsaanissaq pillugu inatsisartut inatsisaat nr. 14, 12. november 2001-imeersoq, inatsisartut inatsisaatigut nr. 10, 14. november 2004-meersukkat allangortinneqarsimasoq atorunnaassaaq.

Imm. 3. Takornariartitsinermik inuussutissarsiorerup nunamilu inuussutissarsiorerup iluanni inuussutissarsiorerinermik siuarsaanissaq pillugu inatsisartut inatsisaanni pisinnaatitsiissutitut maleruagassat atorunnaarsinneqarnissaasa tungaannut atuutiinnassapput.

Imm. 4. Taarsigassarsinissamut neriorsuutit, qularnaveeqqusiinerit imaluunniit tapiiffigineqarnissamik neriorsuutit takornariartitsinermik inuussutissarsiorerinermut aningaasaliissutissatut tapiissutit pillugit inatsisartut inatsisaanni nr. 15, 31. oktober 1996-imeersumi pisinnaatitsineqarluni tunniunneqarsimasut,

nunami inuussutissarsiutinut aningaasaliissutissatut tapiissutit pillugit inatsisartut inatsisaat nr. 20, 30. oktober 1998-meersoq aamma takornariartsitsinermik inuussutissarsiuteqarnerup nunamilu inuussutissarsiuteqarnerup iluanni inuussutissarsiutinik siuarsaanissaq pillugu inatsisartut inatsisaat nr. 14, 12. november 2001-meersoq suli atuupput, inatsisartullu inatsisaat manna malillugu naleqqussarneqarlutik.

Inatsisartut inatsisaat nr. 20, 23. november 2017-meersoq (elektroniskimik saqqummiunneqartoq)* tulliuttutut atortuulersitsinermik aalajangersagaqarpoq:

§15 imm. 1

Inatsisartut inatsisaat manna 1. januar 2013-imi atortuulersinneqarpoq.

Aallarnisaasunik ineriartortitsinermik ingerlataqarnermut tapersiisarneq pillugu Inatsisartut inatsisaat nr. 4, 3. juni 2016-meersoq (elektroniskimik saqqummiunneqartoq)^[1] tulliuttutut atortuulersitsinermik aalajangersagaqarpoq:

§ 2

Inatsisartut inatsisaat atortuulissaaq ulloq 1. juuni 2016.

Nunami inuussutissarsiutinut tunngatillugu inuussutissarsionermik siuarsaaneq pillugu Inatsisartut inatsisaata allangortinneqarnera (Annikitsunik taarsigassarsititsisarnermik aqqissuussineq) pillugu Inatsisartut inatsisaat nr. 27, 17. november 2017-meersoq (elektroniskimik saqqummiunneqartoq)^[2] tulliuttutut atortuulersitsinermik aalajangersagaqarpoq:

§ 2

Inatsisartut inatsisaat 1. januar 2018 atuutilissaaq.

Nunami inuussutissarsiutinut tunngatillugu inuussutissarsionermik siuarsaaneq pillugu Inatsisartut inatsisaata allangortinneqarnera pillugu (Erseqqissaaneq nipilersornermik inuussutissarsiutinut aamma filmiliornermi inuussutissarsiutinut tunngatillugu) Inatsisartut inatsisaat nr. 21, 1. december 2021-meersoq (elektroniskimik saqqummiunneqartoq)^[3] tulliuttutut atortuulersitsinermik aalajangersagaqarpoq:

§ 2

Inatsisartut inatsisaat atortuulissaaq ulloq 1. januar 2022.

Nunami inuussutissarsiutinut tunngatillugu inuussutissarsiornermik siuarsaaneq pillugu Inatsisartut inatsisaata allangortinneqarnera (Annikitsumik taarsigassarsititsisarnermik aaqqissuussinnermut atorunnaarfissaannut ulluliussap atorunnaarsinneqarnera, qinnuteqartunut piunasaqaatinik qasukkartitsineq, inunnut pisortanut annertuunik akiitsulinnut tapersiinissamut killiliinerup atorunnaarsinneqarnera aammalu aaqqissuussinnermi allangortitsinerit annikinnerusut allat) pillugu Inatsisartut inatsisaat nr. 61, 25. november 2024-meersoq (elektroniskimik saqqummiunneqartoq)^[4] tulliuuttut atortuulersitsinermik aalajangersagaqarpoq:

§ 2

Inatsisartut inatsisaat ulloq 1. januar 2025 atuutilerpoq.

Namminersorlutik Oqartussat, ulloq 3. december 2012

*Inuussutissarsiornermut, Aatsitassanut, Nukissiutinut, Inatsisit Atuutsinneqarnerannut, Naligiissitaanermullu
Naalackersuisoqarfik, ulloq 20. oktobari 2025*

Jørgen T. Hammeken-Holm (Atsior.)
Naalackersuisoqarfimmi Pisortaq

Marte Lorna (Atsior.)

[1] (Inatsimmik allanguineri §§ 1a,5a aamma 10 imm. 1 allangortinneqarput)

[2] (Inatsimmik allanguineri §§ 1b, 5b, kap. 4-p Qulequtaa, 9a, 10 imm. 1 aamma 12 imm. 4 nr. 1 allangortinneqarput).

[3] (Inatsimmik allannguinermi § 2, imm. 1 allangortinneqarpoq).

[4] (Inatsimmik allannguinermi Inatsisartut inatsisaata taaguutaa, §§1b, imm. 1, § 1 b, imm. 3, § 2, imm. 1, § 7, imm. 4, oqaaseqatigiit aappaat, § 7, imm. 5, § 8, imm. 2, § 8, imm. 3 pineqarput.

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut